

同治鄞縣志

第一六冊

鄞縣志卷四十七

列女傳二

皇朝一

葉氏名定慧字止瓢

周齊曾撰傳

聞世麟之妻

聞志

性道之母也居恆以

讀好書說好話做好人行好事四語爲訓於人嘗謂其子曰汝

曹恪承世德當使書種不絕若夫成名則自有數候慎無投濁

流以博旦暮榮性道昆弟貧甚葉終身蓬蓽絕無怨尤卒年六

十有五

周傳

性道妻韓氏亦以賢聲著

錢志

李文玉儀部李桐女鄴嗣之女兄也

○案錢志作女弟誤

數歲知書曉古今

大義母病嘗欲以身代年十九歸邱氏

李鄴嗣撰傳

踰年卽置所媵

爲壻妾嘗思出世

李鄴嗣梵大師外傳

會壻將就試台州舟檣甬江許諸

人爲祖行酒微酣登舟行數十步忽大風起舟覆十餘人俱溺

死邙有一僕習潮能出沒海中是日亦大醉從水中抱主不能躍遂同死玉聞信驚號二十里遙望江潮輒舉身踊赴水爲左右所持哭三日夜不沾勺水對蛟門狂呼竟得屍爲治含殮如禮哀慟屢月或慰之曰汝年甚少可徐作後圖奚自苦玉聞言恐有奪其志者乃自取火燧面斷被髮割四體數騰跳奔江家人禁之不得父桐徐謂之曰汝上有寡姑且後嗣未立此俱大事汝其聽我彊藥食他日事成卽聽汝著逍遙服自老可也玉始首肯自是奉姑彌謹姑嘗病頭瘡玉以臂枕姑姑眩不省玉伺姑氣息不敢動踰三日姑蘇見身仍在玉臂中相持而哭姑卒立從子爲後

李傳

未幾父殉國難葬畢卽出家薙髮時聞空中

奏梵聲階前驟長神芝數本相從披衲者十餘人初居在中庵

以從學日眾乃於城中構戒珠庵

外傳

戒行精嚴足跡不出門閭

錢卒年六十有八外傳

李鄴嗣送女兄文玉入山為沙門詩至理可使無情嘲洪濤不沈火不爇大節每能生神奇空山吐咀草吐芝古今曾幾奇女子文姬娥親數人耳磊磊氣薄星日芒空閨夜半拜寒霜女貞手植三十載耘海桑青色不改一坏新碧父之血魂何所歸扣文佛禪燈初熒暮氣森諸天奔其鐘鼓音

汪氏盧文英妻年少守節與李文玉同居戒珠庵長齋繡佛精修

梵行老病家人迎之歸歿與文英合葬錢志

金氏名迷字友之至孝能詩

三補者舊傳

年二十五歸周容姑特愛之

每聞容罄咳坐必起迎三年如一日

周容祭亡婦文

順治乙酉喧傳土

寇入城時金方產女七日容欲奉父母出避父母徘徊不前金

知之曰以吾故使舅姑瀕於危不可然吾亦豈可辱乃作素羅

之歌引羅自經婢急解之雖未絕然困不能起竟死

全祖望周容墓幢銘

容憐之廿載不續後遵父命娶楊氏女

○案全祖望周容墓幢銘云容再娶梁氏與此

異楊氏名存字文定著有女訓三補者舊傳

素羅歌素羅素羅兮嫁時藏病遭兵變兮伴爾亡舅姑堪避兮往高岡有女甫生兮累汝父之哺漿吾潔吾身兮尋亡親而倘祥

何氏歸諸生李銓爲繼室未閱歲銓卒何年十九前室子景濂甫

六歲曹志○案鮪埼亭集作五歲親黨有欲奪其志者何毀容垢面誓無二

志以女紅課子親黨罕得一見全祖望凱風說嘗攜景濂之冢閒風雪

中負土築墳哭聲出林樾銓故寒士父母先亡頽垣敗壁母子

形影相弔或終日炊煙不舉節操愈厲課景濂甚嚴一燈紡讀

嘗至夜分苦節五十餘年順治九年旌曹志

謝氏幼端慧知書年十六從母避亂之天台道遇土賊盡掠其貲

謝懼賊侵先臨溪而立示將溺焉賊欲得其金錫謝亟取而投

之溪曰吾物甯付清流豈爲賊手污乎年二十二歸沈光僑案○

此三字據曹志補

謝故美姿容而光僑貌極醜且貧人謂其必不相能

也而謝情好甚篤未期年夫病卒日夜號慟以死自誓其母常

溫言解之則曰兒已失所天矣何樂乎有生惟願從夫子偕遊

地下斯甚樂也順治十一年有新孝廉慕其色遣媒來謝呼天

狂慟曰吾旦夕未亡人耳此言何爲至吾耳遂裂媒氏之衣而

唾之卽日冒風雨奔哭殯所大呼心痛遂嘔血未幾卒

朱志

孫氏適余應蛟年二十六夫亡誓死不再適教其子豹爲諸生有

司月給米贍之終身表其門曰祿養貞壽年八十四卒

聞志

王氏年十八歸楊大澄甫三年大澄卒王誓死守節遺腹生一子

鞠育備極艱苦及長授之室卒年七十有五

朱志

陳氏繆明城妻年二十二而寡撫孤世選守節世選娶余氏年十

九而世選亦卒撫孤纔成人復客死姑婦伶仃茹苦恆至絕食

順治間有司以雙節表其門陳年七十八余年八十卒

聞志

楊氏丁鄧南妻年二十四而寡矢志撫孤卒年九十子承元亦蚤

卒婦楊氏奉姑撫孤子成立郡守楊之柄兩旌之

聞志

呂氏諸生趙宗元妻順治己亥海寇入東鄉大掠呂抱一女孩奉

姑避亂舟行數里遇寇欲污之先劫姑入水呂拋女於岸趨救

姑遂同溺死時五月三日也越數日收斂其屍顏色如生

曹志

范氏殷仲會妻順治己亥五月海寇掠東鄉走避不及寇止之罵

寇爲所殺逾三日仲會收其屍於田間時酷暑面如生兩手握

裙帶不可解

范光陽撰傳

范光陽范氏殉節詩南風五月吹鼓聲鼓聲漸起侵江城江城蕩蕩不可上白日坐閉幽燕兵任使鯨鯢恣剽畧殺人如草供歡噉急呼小艇避錢湖半爲蟻風歸溟漠一朝轉掠殷家村村民鳥散飛驚魂殷生有婦行且誓義則死爾敢偷存三五健兒齊下馬欲射不射聲呶呶但言從我卽得生否將汝血膏荒野婦言鼠輩豈不聞麒麟甯與狗彘羣我不從汝汝殺我死當殺

汝清妖氛可憐捐生在頃刻賊亦顧之增太息烏鳶蠅蚋遠遁
逃溽暑冰魂不改色吁嗟乎我思當年賣國徒今爲大帥懸金
符賊來不拒去不躡
慚愧紅顏非壯夫

陳氏樂元會妻年二十二而寡教子成人娶婦郭氏時值海寇掠

境陳與郭氏乘舟而避適遇賊姑媳俱抱石投水死

曹志

陳氏趙文炳繼室海寇犯東鄉陳攜老母幼子避難猝遇賊欲污
之陳牽母與子坐地大罵賊怒斷其一臂遂赴水死後其家求
屍得一斷臂者顏色盡變不可識家人因祝云如果是屍當自
旋時水靜無風屍忽轉東而西後卽不動人咸異之邑令劉陶
祁旌之曰舍生完節

曹志

李氏名德貞王朝幹妻海寇犯東鄉居民以錢湖可恃無恐挈眷
以避至則環湖皆寇李對其姑泣曰賊勢猖獗難保無虞抱幼
子赴水死寇退撈屍不得夫夢李曰妾恐污觸神祇聊借柳陰

以蔽體詰旦如言以往果得之時值溽暑顏色不變曹志

邵氏名貞定海人諸生邵元聞女許字舉人張鸞子美南曹志順治

己亥海舟肆掠張鸞祭女從祖母避難懼為所逼欲自縊祖母

止之女曰邵固儒家張亦官族身或受污死晚矣遂赴水鎮海縣志

既沈祖母使人援之起須臾復沈如是者再時方夏日踰九日

始得屍容色不改祭文

徐氏案浙江通志亦作徐氏錢志引作陳氏誤歸錢某海寇入東鄉欲污之婦不從

以刀脅之堅拒如故且罵詈之賊怒刺其腹而死聞志

應氏東鄉丐也海寇至偕其曹避村廟中有卒入欲污之挽之不

動卒怒其曹恐見害勸之就應佯許諾卒喜稍縱之遂逸出將

投井為卒所持不得入復威逼數次終號泣不從卒怒亂斫之

死年十八朱志

李氏年十七歸邵大寶順治己亥海寇掠東鄉大寶殞於水李年三十悲號仆地兩目幾喪遺腹生子家有餘貲同族謀其產力勸改適李峻辭拒之勸者不遂至藏匕首欲害遺孤李朝夕防護卒能成立年八十四卒

邵氏譜

張氏邱瑞一妻順治丙戌海寇掠東鄉瑞一被擄逾年得還而身已染病數歲竟卒張年二十九子甫及週歲苦志自守凡四十九年郡守高啟桂以玉映冰霜獎之

邱氏譜

童氏徐國忠繼室國忠爲族人八七所殺童年二十六成婚纔六十日時八七并捕國忠子光日光耀二子國忠前妻所生年俱幼童與國忠弟國美皇遽匿之稻箱中搜勿獲童乃徒跣求同族爲二子請命八七曰與我白金盈桮始貸若子死童復哀號於族人眾爲感動遂贖金如數捕始去是晚童至國忠死所然

竹作炬枕尸哭以鍼線紉其首卽掘土葬之會國美潛攜光日光耀走餘姚之湖田童亦匍匐往與二子相依日則提筐乞食夜則挈二子宿郵亭古廟每語之曰我一嫠婦爲汝二人未成立忍恥以生汝他日不能雪父之冤吾死日亦不瞑言訖輒淚涔涔下順治九年光日年十八告於母臚列前事控之邑令卒致八七於法遂迎母與叔返於舊居

范灼撰傳

李氏年十八適陳泰交二十一歲而寡孝事舅姑撫嗣子自賡爲

諸生順治間饑饉游臻貧苦自慰年七十七卒

曹志

薛氏邑諸生邱子鼎妻崇禎壬午子鼎與父祖述相繼病卒子克

承生四歲姑陳氏慮幼孫不可保更擇從子子旻爲嗣爲娶婦

陳氏踰年生子克茂而旻又卒陳時年二十三

鄭梁三節祠記娣姒竝

年少誓撫二孤時海氛未靖薛嘗以小刃隨身語陳曰備之不

幸可免辱也薛年四十三卒

錢志○案原文亦引鄭記今攷鄭記無此數語一門三節

鄉里莫不歎息後克承請旌以格於年例僅旌陳氏乃以所給

貲建屋祀旌婦於中而并祀兩氏焉因名之曰三節祠

鄭記

李氏名允清字蓮舫適朱廷鑑

○案謝爲雯張煌言傳作朱金鑑

性至孝九歲時

母邁危疾潛刲股以進疾遂愈博通書史能詩文所著有課紅

餘藝及載德篇

聞志

提督張杰聞其才延爲女師會杰執明尙書

張煌言焚其書籍於庭允清急遣婢向焰中取書得煌言所著

北征錄奇零草木杰追之允清易案上邸報二本應追者投諸火

尙書遺集得畱人閒允清之力也

謝爲雯張煌言傳

卒年八十有二子

獻臣妻董氏亦知書事舅姑甚謹宗黨稱之

聞志

案曰全祖望續耆舊傳云朱獻臣原名廷鑑改名世溶最

後更今名娶蛟門謝氏范香谷兆芝其寮壻也據此則獻

臣卽廷鑑之更名其妻乃謝氏與聞志所載迥異攷全氏傳中稱獻臣有遺集予與其子德言交曾見之則廷鑑之更名獻臣必非臆造而聞氏與獻臣同時亦不至譌謬若此二說未知孰是姑竝存之

邵氏年十七歸李燧升爲側室燧升登進士官漳州推官以科場事株連獲罪遣戍鐵嶺邵所生子紹中尙在襁褓家居撫育藐孤備極荼苦順治十八年燧升遇赦歸歿於長洲旅舍邵聞訃投繯自經時年二十七同治九年里人採訪遺事始聞於

朝旌其門

旌冊

范兆芝女定海人許字陸宇燦之子經旦兆芝卒女以痛哭瞽其目范意陸不復娶陸曰吾方重其孝當撫之如女耳後竟以痛

父過哀死

續者舊傳

葉氏

○案曹志亦作葉氏錢志引作唐氏誤

適徐友傑年二十七而友傑亡矢志守

節終始不渝康熙間有司旌其門年七十七而卒

聞志

唐氏錢廷碩妻夫亡守節撫三子成立年登八十孫曾濟濟康熙

閒邑令朱士傑旌其門曰柏貞芝瑞

錢氏譜

張氏謝德厚妻年二十四夫亡卒年七十四康熙十四年郡守高

啟桂旌其門曰德操冰霜

謝氏譜

厲氏謝大知妻年二十九夫亡守節五十二年同族有大德妻王

氏年二十八夫亡守節六十年大極妻周氏年十八夫亡守節

三十四年大海妻邱氏年二十三夫亡守節十五年邦本妻王

氏年二十八夫亡守節四十八年國禎妻李氏年二十八夫亡

守節二十八年

謝氏譜

林氏名蕤錦字雲青時躍長女少習禮教通經義閭族比之曹大

家許字黃誕先誕先痿痺困頓牀褥諸嫺戚咸謂無娶理林聞
卽截髮墮指誓於父母前曰兒爲黃氏婦此身已屬壻卽不起
亦當以身殉況猶望其起耶遂歸黃鬻奩具治丸劑日進三四
度而誕先終柴瘠嘗得驚眩疾遇生人來昏眩欲絕林侍之十
餘年翁姑哀憐之爲叩斗府祈子嗣果生子女各一而子竟殤
誕先亦遂不起林撫遺女荼苦萬狀承七世祀事惟謹或以其
嫠而貧也勸以祀事歸兩叔林曰焉有夫爲宗子身爲冢婦而
委棄祀典哉又時時念父老省候殷勤諸襪衣縫紉必先時具
進以一身周旋兩家苦節純孝爲世所稱

林時躍
撰傳

妹椒錦字佩

香幼聰穎勤習書史精音律工綦尤善丹青嘗繪四時花譜曰
金谷春粧蘭亭香煖蓉江澹品綠雪流姿其目也年十九歸謝

于道事舅姑以孝稱未幾病嘔血卒三郇惜之

林時躍亡
女小傳

劉氏朱鉞妾名璧字崑白閩人善繪蘭瀟洒無脂粉氣亦能詩續

舊傳

董道權題劉璧畫蘭冊詩深柳堂邊機杼聲停機笑聽讀騷清
開奩一展琉璃匣九畹香從十指生江南花譜羨春黃沉澧
秋叢紫更香解得深閨圖
畫意東籬晚節與同芳

徐氏御史殿臣女適董允瑄事舅德偁能先意承志德偁嗜飲一
日尊中酒竭則攢眉徐見之輒百方致酒兼以時味允瑄雖善
事其父而委曲將順皆出徐氏同里陳赤衷亦最孝嘗在允瑄
座次忽曰頃見江上石首魚船已到矣徐在房中聞之遽脫簪
珥市魚至及進饌赤衷沈吟不食允瑄怪聞之曰此爲君而設
也赤衷曰吾母未嘗吾敢先食徐遽遣婢出曰適市三尾一進
堂上一已送至陳相公家爲太母膳此其餘耳赤衷下拜曰有
是哉嫂氏錫類之仁也初徐氏妝具最盛至是一空所有夏日

不能具羅衣冬日衣大布晚無重衾每食菜素而已而徐絕無
怨色人以爲難允瑫仲弟允珂妻王氏僉事續爵女于歸甫一
歲續爵殉難揚州王哭父以哀毀死季弟允璘妻周氏允璘病
刲股和藥以進允瑫子元晉妻謝氏名緒芝鎮海人知縣歸昌
女有賢行與元晉妾管氏名惺俱能詩每相唱和元晉又嘗幸
一婢元晉卒其婢哭拜柩前終身守節亦世所難

續者舊傳

高氏巡撫斗樞女自幼通書史工詩畫歸奉化戴天柱時戴家就
落高安貧一室互唱迭和相對如賓友以止生一女勸天柱早
立繼嗣且置簪室卒育多男其識量邁絕尋常如此

刻川詩鈔

張氏歸齊天民天民以諸生授徒里閭張事舅必具甘旨會崇禎

末歲稷禾穀不升餐及秭榆而舅不知其爲稷也

毛奇齡特旌齊母錄○案

曹志云天民卒會兵荒薦臻斗米五百錢織紉不繼茹及草已
根木皮而張氏操愈嚴以歲荒爲天民沒後事與此少異